


Pakico nos tin e empeño pa reconoce Papiamento?

Pasobra un pueblo cu no ta aprecia su idioma ta un pueblo espiritualmente mutila



ORANJESTAD (AAN): Juan Chabaya Lampe, miho conoci como "Padú del Caribe" a crece den un cas caminda semper alegria musical tabata reina y den e ambiente aki su interes pa musica a lanta.

Cu 12 aña di edad ya caba Padú tabatin basta agilidad riba clarinet, mandolin y cuarta. A lo largo ta piano a bira su instrumento preferi y na dje el a dedica gran parti di su tempo.

Padú a haya su prome lesnan di piano cerca su tata, Henry Lampe, y despues a sigui haya les di Señora Shisi Rodriguez. Na aña 1946 Padú a casa cu Daisy Croes, di cua matrimonio tin solamente un yiu, Vivian.

Padú a ricibi su educacion

basico na Juliana School, despues el a sigui estudionan mas avansa na cas mes.

Durante di Dos Guerra Mundial, Padú a presta servicio militar y apesar cu e mes no tabata sinti mucho amor pa militarismo, el a logra progresa den e poco tempo cu e tabata den dienst.

Padú a traha na varios empresa, entre otro den e negoshi di Jani Eman ("Shipchandler"), despues den "Hardware and building material store" di su omo, Addison W. Croes. Padú a maneha tambe un negoshi di instalacion electrico.

Despues el a forma parti di gerencia di ALM, prome como hefe di venta y despues como representante di ALM na Aruba. Cu Alm Padú a



traha mas cu 15 aña y na 1980 el a bay cu pension.

Mientras Padú tabata traha pa su famia, el a dedica hopi di su tempo liber na musica y pintamento.

Na aña 1951, Rufo Wever y Padú Lampe a sinti e necesidad pa cuminsa conserva y promove tur loke nan ta considera como ritmo y melodía típico di Aruba.

Inspira pa tal idea, hunto nan a cuminsa cu grabacion y produccion di disconan di 78 RPM y lansa nan riba mercado di Antiyanan Hulandes. Di e forma aki nan a haci un contribucion sumamente valioso na conserva y propaga nos ritmonan, entre otro wals y tumba, cu awe ainda ta sigui resona cu alegria den oido di nos pueblo.

Un mainta na aña 1952, Padú a yega cerca Rufo, cu e idea pa nan compone un pieza cu lo mester expresa e amor y lanta e sentimento patriótico di nos pueblo pa Aruba. E mes un dia ey e pieza a keda cla. Na 1954 Radio Kelkboom a graba e pieza aki riba disco 78, cu canto di "De Trupialen" bao direccion di Frere Alexius. Padú mes a toca piano pa grabacion di e disco aki.

Dia 16 di Maart 1976 Parlamento di Aruba a aproba "Aruba Dushi Tera" como himno oficial di Aruba.

Semper Padú a coopera cu e agrupacion hubenil "De Trupialen", cu a bira hopi popular bao direccion di Frere Alexius. De Trupialen a sêr lanta na aña 1953 y te ainda e grupo aki ta activo.

Segun cu Hubert Booi tabata skirbi letra pa cancionnan pa "De Trupialen", Padú tabata pone

nan riba musica.

Padú no ta un musico di profesion, sin embargo tur loke el a produci riba e tereno aki, a haya admiracion den pueblo.

Padú su prome LP a worde poni riba mercado pa Alfred Capello di e compania diskero "La Bonanza" na Curaçao. Titulo di e LP aki ta "Round trip with Padú del Caribe".

Su LP "Padú del Caribe en Venezuela" graba na 1960 a bende mas cu 50.000 copia. E LP aki a bira un hit pa cua Padú a ricibi e afamado "Piano de Oro". Na aña 1993 Padú a saca su prome CD "Recuerdonan Stima".

Padú tabata e prome persona cu a cuminsa cu presentacion di nos talentonan local na television Arubano na aña 1963. Varios artistanan a debuta y actua cu frecuencia den "Padú del Caribe y su show". Padú tabata presenta e programa aki un biaha pa siman na Tele Aruba, bao auspicio di Esso y pa un periodo di tres aña.

Riba tereno di arte di pintura tambe Padú a demostra su destreza. Padú ta completamente auto-didactico den pintamento. Padú a yega di participa na varios concurso di arte di pintura riba nivel internacional. Na aña 1939 Padú su cuadro "Typical view of Aruba", exhibi den un exposicion internacional na "World's Fair" na New York, a gana un medaya di brons cu inscripcion riba dje cu ta bisa: "For a contribution to the art of the world".

Na aña 1954 su cuadro "Fruitmarket at the seaside" a gana e prome premio regional den un exposicion di arte Caribense, teni na New York.

Padú a skirbi tres buki riba e topiconan di parasicologia y fenomenonan sobrenatural. "The 3rd Element", Harmoniology y Ciencia acercando e mundo espiritual.

Pa su esfuerzonan den ramo artistico Padú a ricibi diferente premio y reconocimiento; entre otro: "Award for distinguished services rendered to the community of Aruba" na 1966 di Kiwanis Club of Aruba. Un distincion halto di "Paul

Harris Fellow" na 1991 di Rotary Club of Aruba.

Na 1991 un homenahe den Golden Tulip Hotel for di e popular cantante Dhaddy Brokke.

Na 1993 un plakaat cu un CD y Cassette di Oro presenta pa "Zona Bon Records".

"Top 20 awards" di Radio Galactica.

"Den ambiente Awards" pa su CD "Recuerdonan stima". Na aña 1972 Padú a ricibi di Su Mahestad Reina Juliana e condecoracion di "Ridder in de Orde van Oranje Nassau". Na aña 1986 Padú a ricibi di Su Alteza Real Prins Bernhard e honor mas halto riba tereno cultural Hulandes, e "Zilveren Anjer".

Na 1960 Padú a ricibi e premio "Piano de Oro" pa su LP "Padú del Caribe en Venezuela".

Na 1975 Gobierno venezolana a condecora Padú cu e Orden di Andres Bello Segunda Clase".

Na 2006 Grupo Cultural "De Trupialen" a dune un homenahe y a pone Padú riba nan "Muraya di Fama".

Cu su musica Padú a hiba nos cultura pafo di Aruba y a haci nos isla conoci na diferente pais. Cu su carisma Padú tabata duna su cooperacion tambe pa promove nos turismo den exterior.

Pa duna inicio na "Nos Luna di Cultura" Van Dorp Book & Office na Dakota tin e placer y honor di tin Padú cerca nan pa promove su ultimo CD.

Riba su ultimo CD "Padú del Caribe" Padú ta canta 12 cantica di su propio inspiracion dedica na su querida esposa Daisy. Cancionnan inolvidabel manera: Abo so, Nami un chens, Mi no sa, Foi dia m'a mirabo, Ban baila e dansa' ki, Despedida y otronan.

Diasabra 1 di Maart 2008, pues Padú del Caribe, lo ta na Van Dorp Book & Office, di 11.00 a.m te 1.00 p.m pa ofrece su CD nobo y firma esaki pa tur interesadonan. Bini un bini tur bin pasa un rato agradabel cu un baluarte di nos Cultura y asina demostre cuanto aprecio y amor nos tin pe.

Chandi's Café

Ta presenta

Diabierna 29 Feb. 2008
for di 10:00 P.M. te cu 2:00 A.M.

Banda SED

Adres: Venezuelastraat 40,
ex Tat-Fat of El Porton I

